

修訂日期: 2004/10/14 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 19, No. 980

原始資料: 蕭鎮國大德提供, 北美某大德提供

## No. 980

### 大勝金剛佛頂念誦儀軌

南天竺三藏金剛智奉 詔譯

爾時世尊為末世一切眾生故。現五種光明。從頂上放火光。照三界所有惡魔鬼神等不信佛教者。同時悉焚燒。金剛手菩薩見是相已。白世尊言。如來智火被燒所有天魔鬼神於眾生害者。悉恐怖不得安樂。欲說何法。唯願如來演說。爾時大毘盧遮那佛告金剛手菩薩言。有明王名大勝佛頂心呪。誦一遍所求滿足。十方諸佛中最勝明王。若有金剛子。誦滿五萬遍。一切諸佛大菩薩天龍天女眾。晝夜共守護令成所願。爾時如來說明曰。

唵麼賀縛日羅(二合)瑟拏(二合)灑吽(引)怛路(二合)瀨利(二合)惡(入)吽(引)

二手內縛忍願屈如頂。是名根本大印。若有末法轉時。有諸眾生常結此印持念真言者。一切兵力不能相害。水火不焚漂。不便一切惡魔惡鬼。金剛胎藏聖眾坐臥咸來增擁護。

復次說畫像法。於黑月房宿取清淨絹素。畫大勝明王。戴五佛冠。出現十二臂。住智拳印。執五[月\*古]青蓮花寶珠羯磨鉤索鎖鈴利劍輪等印。安住千葉白蓮華。身色如白光。遍身成火光。四角畫四明王。東南角畫不動金剛。西南角馬頭金剛。西北角六足金剛。東北角藥叉金剛。畫此四忿怒王。各執器杖。現極猛利勢。次畫八方天王。各舉眷屬恭敬圍繞。若有真言行者欲供養者。於淨室及山林靜處。燒香散時花。念誦真言五十萬遍。我及八佛頂無量天菩薩金剛天等。現身常隨意奉仕。若有眾生每日誦持此真言。於現在生之中。勝一切天人。當末世中。身如遍照尊。持此印真言者。能成就十億種所願。復若有行者。作種種降魔及一切阿尾捨法者。我作十千金剛童子。則隨意持誦者常住。若悲心莫他相憎。觀吽字心上。行住坐臥住本尊三摩地。成就一切願。有情見者。悉歡喜愛念。此人如遍照尊。無量諸佛常來覆護不捨。真言行者不起貪瞋癡等煩惱。深歸命三寶。以善根迴向六道者。必速證無上菩提。行者諸穢處用烏瑟摠摩金剛呪印加持五處。以右手四指作拳。直豎彈指。密言曰。

唵俱路(二合)馱曩吽弱

### 大勝金剛佛頂念誦儀軌

一校了

康元二年二月二十九日

於覺洞院書寫之了  
金剛佛子 親尊(二十二)